

no che el dito Vita hebreo dando ducati 250 possi venir in questa terra, che li manca mexi 20 a compir.

E li Avogadori di Comun andono a la Signoria, dicendo è contra le leze, e li Savii prediti non potevano meter tal parte; et fe' lezer la parte bisogna li Consieri meta. *Unde* li Consieri, excepto sier Alvise Mocenigo el cavalier e li Cai di XL, introno in opinion di preditti Savii, con questo dagi ducati 350. Et sier Marin Morexini intrò in questa opinion. Il Condolmer e il Malipiero messe dagi ducati 300, et sier Marco Foscarei savio a Terra ferma, contradise dicendo non è da vender la justitia per danari, è contra le leze; fe' bona renga persuadendo il Consejo a non voler la parte.

Et sier Antonio Condolmer li rispose, fe' renga artificiosa, dicendo per la vita si fa questo; e voria si fusse assa' Vita desse danari, cussi dicendo molte cosse che fe' rider più volte il Consejo. Hor venuto zoso, introno tutti in la parte di Consieri, e sier Marco Foscarei savio a Terra ferma messe star sul preso di Quarantia, contra a quello Vita. Andò le parte 130 di Consieri, 63 dil Foscarei, di no 3, nulla non sincere.

Fu posto, per li ditti, che atento Stefano Lucini da Portogruer, di anni 26, habi uno officio di signada a le biave, qual ha de utilità ducati 25 a l'anno, e cessando il dazio di la masena ne haverà mancho, e vol quello renonciar ad Antonio Ganason fiol di Bortolo cavalier dil Serenissimo, qual vol dar ducati 50, per tanto sia acceptà li diti ducati 50, e lui habi l'officio. Et perchè Hironimo Polito ave per deposito di ducati 70 una expetativa di diti signadori prima vachante, sia dechiarito che *casu quo* ditto Stefano mancasse, esso Hironimo Polito possi intrar, et questo Antonio Ganason resti nel grado era dito Hironimo Polito. Ave 130 di si, 54 di no, una non sincere.

213* Fu posto, per li diti, atento fusse preso in questo Consejo, che tutti li officii vachavano i quali erano eleti per li Signori di officii per zorni 15 avanti, dovesseno notificar a li Savii sora le acque, aziò per deposito si possi elezer in loro locho; et essendo vachado tre stimadori al dazio dil vin, sia preso che si debi aldir quelli boteri vorano esser, con offerir danari per li Provedadori sora le aque, et li officiali al dazio dil vin, et elezer etc. 131, 54.

Nota. In la parte di cavar di canali posta dar sora le aque, per esser materia *non solum* dependente ma substantialmente conjunta *etiam* le reparation di fondamente, restando a li Provedadori di

comun el cargo di pozi, ponti e salizade, *item*, non si possi dar burechiele a cavar ad alcun, se non per 15 balote dil Colegio *ut in ea*.

Fu leto una *letera* di sier Marin Zorzi el doctor et sier Alvise Contarini, *rectori di Padoa, fata eri*. Scriveno, il Studio va in ruina per non vi esser doctori che lezano, e li scolari forestieri vanno via, et li nostri subditi, non stimando le leze, non voleno più star, non havendo doctori da i qual possono udir, et eri molti scolari fono da loro per questo dimandando licentia di partirsi, però provedase *amore Dei*. Et narano la condition di lectori vi sono. Mancha in *Jus canonico*, è solo domino Antonio Francesco di Doctori, qual è vechio e horamai vorria riposar: in *Jure civil* l'ordinaria, fo conduto domino Brando Porro, non vien, poi el Bagolin suo concorrente non vol lezer si non in augumento; in *Philosophia*, poi la morte dil Presciano vi manca; in *Loyca* è uno zovene che leze: però scriveno l'opinion loro di meter li doctori a lezer, e si conduchi doctori o spagnol o taliano. Dicono, domino Alvise di Locha è amalato zà più mesi, è mal pagarlo e non leze; voriano meter domino Baldisera Cardutio a lezer in *Jure canonico*. In *Medicina* vi manca lectori; sichè non si provedendo, quel Studio va in rovina, che saria grandissimo peccato et danno.

Fu posto, per li Savii dil Consejo e Terra ferma, di condur a lezer nel Studio di Padoa li infrascripti doctori: domino Zuan Mentesda, ispano, leze a Roma, a la lectura dil primo locho di *Philosophia* con salario fiorini 600 a l'anno, avè 176, 6. *Item*, di Piero Paulo Parisio il primo locho di l'ordinaria di *Jure canonico* over *Civil* in libertà di la Signoria, el qual *etiam* leze a Roma. Et domino Marco Antonio Zimara San Petrinis di terra di Otranto, leze a Salerno, a la ordinaria di teoricha overo pratica di *Medecina*, con salario fiorini 300 a l'anno. E questi do ave 180, 4, 4.

Fu posto, per li Consieri, Cai di XL e Savi, atento li meriti di Michali Rali capitano di stratioti, e suo fiol Marchiò Rali morti tutti do a li servicii nostri, et una fiola dil ditto Marchiò nominata Chiara, maridata in sier Zuan Falier di sier Bernardin, *unde* per questo Consejo fo dà provision a Rimonda fiola di dito Michali di fiorini 27 et a Theodora madre di la ditta Chiara fiorini 32 a l'anno a la camera di Corfù: che le dite provision siano tramudà da esser *de cætero* pagate a la camera di Ruigo, e fu presa: ave 163, 19.

Fu posto, per li Consieri, Cai di XL e Savii, con- 214
cieder al reverendissimo Legato pontificio è in que-